



Broj: 01-50-1-15-49/04.
Sarajevo, 29. decembra 2004.

ZAPISNIK

49. sjednice Predstavničkog doma Parlamentarne skupštine Bosne i Hercegovine,
održane 29. decembra 2004. godine

Sjednica je počela u 11,30 sati. Prisustvovao je 41 poslanik. Odsustvo je opravdao Ibrahim Đedović.

Iz Vijeća ministara sjednici su prisustvovali ministri Ljerka Marić i Dragan Doko, te zamjenici ministara Lidija Topić i Ivica Marinović.

Iz međunarodnih organizacija sjednicu su pratili: Maja Ribar i Sanja Stanojević – OHR, Mirsad Žiga – američka ambasada.

Na početku sjednice predsjedavajući Doma Šefik Džaferović obavijestio je Dom da je Izborna komisija BiH, umjesto Muniba Jusufovića, mandat poslanika dodijelila Seniji Kapetanović, sljedećem kvalificiranom kandidatu s liste Stranke za Bosnu i Hercegovinu. Zatim je Senija Kapetanović pred Domom dala svečanu izjavu i time preuzela poslanička prava i obaveze.

U vezi s prijedlogom dnevnog reda, uvodne napomene dao je predsjedavajući Doma. Upoznao je poslanike o dopunama prijedloga dnevnog reda koje su usaglašene na Proširenom kolegiju. Zatim je kao svoj prijedlog iznio da se u dnevni red uvrsti Prijedlog budžeta i Prijedlog zakona o izvršenju Budžeta institucija BiH i međunarodnih obaveza BiH za 2005. godinu, sa zahtjevom predlagača – Predsjedništva BiH, da se razmatraju po hitnom postupku, u skladu s članom 105. Poslovnika. Također je predsjedavajući Džaferović kazao da je dobio pisani prijedlog Seade Palavrić da se u dnevni red uvrsti Izvještaj Zajedničke komisije o usaglašavanju teksta Zakona o porezu na dodanu vrijednost.

U okviru rasprave o prijedlogu dnevnog reda učestvovali su: Jelina Đurković, Seada Palavrić, Nikola Špirić, Zlatko Lagumdžija, Milorad Živković, Muhamed Moranjkić, Petar Kunić, Momčilo Novaković, Jozo Križanović, Azra Hadžiahmetović, ministrica Ljerka Marić, Fatima Leho, Adem Huskić, Martin Raguž, Nijaz Duraković i Mladen Potočnik.

Nakon rasprave i pauze, ministrica Marić obavijestila je Dom da se konsultirala s članovima Vijeća ministara i da povlači zahtjev za proceduru po članu 105. za Budžet i Zakon o izvršenju Budžeta, te da predlaže da Kolegij, u skladu s članom 106. Poslovnika, skрати rokove za razmatranje i usvajanje ovih akata što je moguće prije.

Predsjedavajući Džaferović konstatirao je da je predlagač povukao zahtjev za hitni postupak i da će Kolegij utvrditi rokove za razmatranje Prijedloga budžeta i Prijedloga zakona o izvršenju Budžeta za 2005. godinu.

Dom se izjasnio o prijedlogu Seade Palavrić da se u dnevni red uvrsti Izvještaj Zajedničke komisije o usaglašavanju teksta Zakona o PDV-u. Prijedlog nije usvojen.

Zatim je Dom usvojio zaključak, koji je predložio Jozo Križanović, sljedećeg sadržaja:

Povodom sazivanja 49. sjednice, uzrokovanog potrebom da do kraja godine donesu Zakon o porezu na promet proizvoda i usluga i Zakon o akcizama u BiH, Predstavnički dom Parlamentarne

skupštine BiH izražava nezadovoljstvo odnosom Vijeća ministara prema ovom domu, zbog neopravdanog kašnjenja u upućivanju ovih prijedloga zakona u Parlamentarnu skupštinu BiH. Ovim činom Vijeće ministara pokazalo je da ne upravlja reformama u BiH, nego to radi OHR i Visoki predstavnik. Predstavnički dom upozorava Vijeće ministara da ubuduće neće tolerirati ovakav odnos i traži od Vijeća ministara odgovornije ponašanje kako ovaj dom ne bi dovodilo u situaciju da mora kršiti vlastiti poslovnik i donositi važne zakone u atmosferi pritiska i bez mogućnosti poboljšanja predloženih zakona.

Za zaključak su glasala 24 poslanika, 13 je glasalo protiv. Iz Federacije za je glasalo 14, iz Republike Srpske 10.

Predsjedavajući Džaferović konstatirao je da 49. sjednica Predstavničkog doma ima sljedeći

DNEVNI RED

1. Prijedlog zakona o porezu na promet proizvoda i usluga – prvo i drugo čitanje,
2. Prijedlog zakona o akcizama Bosne i Hercegovine – prvo i drugo čitanje,
3. Davanje saglasnosti za ratifikaciju:
 - a) Ugovora između Bosne i Hercegovine i Republike Hrvatske o izbjegavanju dvostrukog oporezivanja u odnosu na poreze na dohodak i na imovinu,
 - b) Ugovora između Bosne i Hercegovine i Srbije i Crne Gore o izbjegavanju dvostrukog oporezivanja u odnosu na poreze na dohodak i imovinu,
 - c) Sporazuma između Vlade Republike BiH i Vlade Republike Mađarske o pitanjima borbe protiv terorizma, trgovine narkoticima i organiziranog kriminala,
 - d) Sporazuma o transferu i prihvatu lica na državnoj granici između Vlade Republike BiH i Vlade Republike Mađarske,
 - e) Konvencije o transferu osuđenih lica,
 - f) Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju,
 - g) Sporazum o kreditiranju i garanciji između Vlade Bosne i Hercegovine, kao garanta, Vlade Federacije BiH, kao subgaranta i JKP Vodovod i kanalizacija Tuzla, kao pozajmljivača, i Mađarske eksport – import banke I.T.D,
4. Imenovanje tri člana u Zajedničku komisiju radi postizanja sporazuma o identičnom tekstu Zakona o izmjenama i dopunama Zakona o izvozu oružja i vojne opreme,
5. Imenovanje tri člana u Zajedničku komisiju oba doma radi postizanja sporazuma o identičnom tekstu Zakona o porezu na promet proizvoda i usluga i Zakona o akcizama Bosne i Hercegovine.

Ad – 1: Prijedlog zakona o porezu na promet proizvoda i usluga – prvo i drugo čitanje

Predsjedavajući Šefik Džaferović dao je uvodne napomene u vezi s Prijedlogom zakona. Pored ostalog, rekao je da je nadležna komisija na Prijedlog zakona usvojila 14 amandmana i da su u plenarnoj fazi amandmane podnijeli Momčilo Novaković, Hazim Felić i Mirsad Ćeman.

U diskusiji su u prvom čitanju učestvovali: Muhamed Moranjkić, Mirsad Ćeman, Beriz Belkić, Zlatko Lagumdžija i Ljiljana Milićević.

Sa 36 glasova za i jednim uzdržanim usvojen je Prijedlog zakona o porezu na promet proizvoda i usluga u prvom čitanju.

U drugom čitanju diskutirali su: Momčilo Novaković, Dušanka Majkić, Hazim Felić, Muhamed Moranjkić i Mirsad Ćeman.

Momčilo Novaković i Mirsad Ćeman povukli su svoje amandmane.

Dom se izjasnio o amandmanima Hazima Felića. Amandmani nisu usvojeni.

Dom je u drugom čitanju usvojio Zakon o porezu na promet proizvoda i usluga. Za Zakon je glasalo 37, protiv je glasao jedan poslanik.

Ad – 2: Prijedlog zakona o akcizama Bosne i Hercegovine – prvo i drugo čitanje

Predsjedavajući Džaferović kazao je u uvodnim napomenama da je Komisija na Prijedlog zakona usvojila 14 amandmana, a da su u plenarnoj fazi amandmane podnijeli: Vinko Zorić, Zlatko Lagumdžija, Mirsad Ćeman, Momčilo Novaković i Muhamed Moranjkić.

U raspravi u prvom čitanju učestvovali su: Beriz Belkić, Ljiljana Milićević, Zlatko Lagumdžija, Muhamed Moranjkić, Vinko Zorić, Ruža Sopta i Milorad Živković.

Sa 32 glasa za i tri uzdržana usvojen je Zakon o akcizama u prvom čitanju.

U drugom čitanju predsjedavajući je podsjetio na amandmane koji su podneseni u plenarnoj fazi i zamolio Muhameda Moranjkića da objasni svoje amandmane, s obzirom da nije naznačio da li amandmane ponovo brani ili ih je podnio na amandmane Komisije.

U drugom čitanju u raspravi su učestvovali: Vinko Zorić, Momčilo Novaković, Zlatko Lagumdžija, Muhamed Moranjkić, Selim Bešlagić, ministrica Ljerka Marić, Ljiljana Milićević, Mirsad Ćeman i Beriz Belkić.

Momčilo Novaković odustao je od svojih amandmana.

Muhamed Moranjkić rekao je da želi braniti sve amandmane koje je podnio u komisijskoj fazi, naglasivši da zamjera što nije pozvan na sjednicu Komisije kada se o amandmanima raspravljalo.

Zatim je predsjedavajući na glasanje dao amandmane Zlatka Lagumdžije (13 amandmana koje ponovo brani na sjednici Doma).

Dom je usvojio amandmane br. 2., 3., 5., 8., 9., 10., 12. i 13. Ostali amandmani nisu usvojeni.

Dalje se Dom izjasnio o dva amandmana Mirsada Ćemana, dok je od 3. amandmana odustao.

Amandmani Mirsada Ćemana nisu usvojeni.

Dalje je predsjedavajući pokušao na glasanje dati amandmane Muhameda Moranjkića, ali su poslanici kazali da amandmane nisu dobili. Naime, Muhamed Moranjkić je u plenarnoj fazi podnio jedan amandman, bez poziva na odgovarajući član Poslovnika, a u diskusiji se izjasnio da želi braniti sve amandmane koje je podnio u komisijskoj fazi zbog toga što nije pozvan na sjednicu Komisije, iako ih u plenarnoj fazi nije podnio. Međutim, kako poslanici nisu imali njegove amandmane, Moranjkić je, iz protesta, kazao da sve amandmane povlači.

Još su u ovom dijelu rasprave učestvovali: Vinko Zorić i Beriz Belkić, a onda je predsjedavajući na glasanje dao Prijedlog zakona.

Zakon o akcizama usvojen je sa 30 glasova za i jednim uzdržanim – iz Federacije 21, iz RS devet.

Ad – 3: Davanje saglasnostiza ratifikaciju:

- a) Ugovora između Bosne i Hercegovine i Republike Hrvatske o izbjegavanju dvostrukog oporezivanja u odnosu na poreze na dohodak i na imovinu,
- b) Ugovora između Bosne i Hercegovine i Srbije i Crne Gore o izbjegavanju dvostrukog oporezivanja u odnosu na poreze na dohodak i imovinu,
- c) Sporazuma između Vlade Republike BiH i Vlade Republike Mađarske o pitanjima borbe protiv terorizma, trgovine narkoticima i organizovanog kriminala,
- d) Sporazuma o transferu i prihvatu lica na državnoj granici između Vlade Republike BiH i Vlade Republike Mađarske,
- e) Konvencije o transferu osuđenih lica,
- f) Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju,
- g) Sporazuma o kreditiranju i garanciji između Vlade Bosne i Hercegovine, kao garanta, Vlade Federacije BiH, kao subgaranta i JKP Vodovod i kanalizacija Tuzla, kao pozajmljivača i Mađarske eksport – import banke I.T.D.

Predsjedavajući je podsjetio da je nadležna komisija dala podršku svim aktima iz ove tačke.

U raspravi su učestvovali: Vinko Zorić, Momčilo Novaković i Azra Hadžiahmetović, kojom prilikom su iznijeli određene primjedbe u vezi sa sporazumima pod podtačkom c) i d). Zatim je Dom odlučio da se ova dva sporazuma skinu sa dnevnog reda, da bi se razjasnile iznesene nejasnoće.

Dom je dao saglasnost za ratifikaciju:

- Ugovora između Bosne i Hercegovine i Republike Hrvatske o izbjegavanju dvostrukog oporezivanja u odnosu na poreze na dohodak i na imovinu,
- Ugovora između Bosne i Hercegovine i Srbije i Crne Gore o izbjegavanju dvostrukog oporezivanja u odnosu na poreze na dohodak i imovinu,

- Konvencije o transferu osuđenih lica,
- Sporazuma između Vlade Bosne i Hercegovine i Vlade Republike Mađarske o uspostavljanju okvirnog programa za finansijsku saradnju i
- Sporazuma o kreditiranju i garanciji između Vlade Bosne i Hercegovine, kao garanta, Vlade Federacije BiH, kao subgaranta i JKP Vodovod i kanalizacija Tuzla, kao pozajmljivača i Mađarske.

Ad – 4: Imenovanje tri člana u Zajedničku komisiju radi postizanja sporazuma o identičnom tekstu Zakona o izmjenama i dopunama Zakona o izvozu oružja i vojne opreme

U Zajedničku komisiju imenovani su: Seada Palavrić, Vinko Zorić i Nenad Mišić.

Ad – 5: Imenovanje tri člana u Zajedničku komisiju oba doma radi posizanja sporazuma o identičnom tekstu Zakona o porezu na promet proizvoda i usluga i Zakona o akcizama Bosne i Hercegovine

U ovu zajedničku komisiju imenovani su: Hazim Felić, Ljiljana Milićević i Filip Andrić.

Predsjedavajući je u ovom dijelu dao pauzu da bi Zajednička komisija usaglasila istovjetan tekst Zakona o porezu na promet proizvoda i usluga i Zakona o akcizama, s obzirom da su usvojeni u različitom tekstu.

U nastavku sjednice predsjedavajući je podsjetio poslanike da je Zajednička komisija dostavila izvještaje o usaglašavanju identičnog teksta Zakona o porezu na promet proizvoda i usluga i Zakona o akcizama u BiH. Naglasio je da je Zakon o porezu na promet proizvoda i usluga usaglašen sa 12 amandmana, a Zakon o akcizama sa 11 amandmana.

Zlatko Lagumdžija izrazio je nezadovoljstvo što Zajednička komisija nije prihvatila njegove amandmane koji su na Domu usvojeni. Ovim povodom diskutirali su Ljiljana Milićević i Martin Raguž.

Dom je usvojio izvještaje zajedničke komisije o usaglašavanju istovjetnog teksta navedenih zakona.

Izveštaj o usaglašavanju Zakona o porezu na promet proizvoda i usluga usvojen je sa 25 glasova za i 7 uzdržanih – iz Federacije 17, iz Republike Srpske osam.

Izveštaj o usaglašavanju Zakona o akcizama usvojen je sa 20 glasova za, šest protiv i šest uzdržanih – iz Federacije Za je glasalo 15, iz RS pet.

Ovim je, u 20,10 sati, završena 49. sjednica.
Sastavni dio Zapisnika je transkript sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Šefik Džaferović